



REPUBLIKA E SHQIPËRISË



Nr. 305 Prot., datë 09/04/2015

Nr. 1544 Prot., datë 08/04/2015

MARRËVESHJE BASHKËPUNIMI

Lidhur ndërmjet

PALËVE:

**KOMISIONERIT PËR TË DREJTËN E INFORMIMIT DHE MBROJTJEN E TË
DHËNAVE PERSONALE (referuar si KDIMDP), përfaqësuar nga Z. Besnik DERVISHI;**

Dhe:

**INSPEKTORIATIT TË LARTË TË DEKLARIMIT DHE KONTROLLIT TË PASURIVE
DHE KONFLIKTIT TË INTERESAVE, (referuar si ILDKPKI) përfaqësuar nga
Z. Shkëlqim GANAJ,**

Të cilët me vullnetin e tyre të lirë dhe të plotë, bien dakort për sa vijon:

Neni 1

Objekti

Palët nënshkruese bien dakort të institucionalizojnë marrëdhëniet e tyre për aplikimin e procedurave që thjeshtojnë bashkëpunimin e ndërsjelltë të tyre në kuadër të garantimit të të drejtave dhe lirive themelore të njeriut, dhe më veçanërisht në fushën e të drejtës për informim, mbrojtjes së të dhënave personale dhe deklarimit të pasurive dhe konfliktit të interesave. Për arritjen e këtij qëllimi, bashkëpunimi i palëve do të realizohet mbi baza të njëjta dhe mbi parimin e reciprocitetit.

Neni 2

Baza ligjore

Baza ligjore e kësaj marrëveshje është ligji nr. 9887, datë 10.3.2008 “*Për mbrojtjen e të dhënave personale*”, i ndryshuar; ligji nr. 119/2014, datë 18.9.2014 “*Për të drejtën e informimit*”, ligji nr. 9049, datë 10.4.2003, “*Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë*”, i ndryshuar, si dhe ligji nr. 9367, datë 7.4.2005 “*Për parandalimin e konfliktit të interesave në ushtrimin e funksioneve publike*”, i ndryshuar.

Neni 3

Fushat e bashkëpunimit

Komisioneri për të Drejtën e Informimit dhe Mbrojtjen e të Dhënave Personale dhe Inspektorati i Lartë i Deklarimit dhe Kontrollit të Pasurive dhe Konfliktit të Interesave angazhohen që të bashkëpunojnë me njëri-tjetrin, dhe në mënyrë të veçantë:

1. Palët angazhohen të kërkojnë mendimet dhe sugjerimet e njëra - tjetrës në rast të hartimit të akteve të ndryshme, që prekin objektin e veprimit të palës tjetër.
2. Palët angazhohen të bashkëpunojnë në organizimin e aktiviteteve të përbashkëta kombëtare dhe ndërkombëtare që i shërbejnë zbatimit të ligjeve respektive.
3. Palët angazhohen të shkëmbejnë në mënyrë të vazhdueshme njohuri dhe praktika të reja.
4. Palët angazhohen të caktojnë personat përgjegjës për zbatimin e detyrimeve të përcaktuara në ligjet respektive.

Neni 4

Detyrimet e palëve

Secila nga palët nënshkruese angazhohet në ndjekjen e objektivave dhe detyrimeve të kësaj marrëveshje.

1. Inspektorati i Lartë i Deklarimit dhe Kontrollit të Pasurive dhe Konfliktit të Interesave dhe Komisioneri për të Drejtën e Informimit dhe Mbrojtjen e të Dhënave Personale angazhohen si më poshtë vijon:
 - a. Të bashkëpunojnë dhe bashkërendojnë punën për hartimin dhe rishikimin e programeve të transparencës, kodit të etikës dhe kostove e tarifave të shërbimeve. Gjithashtu, do të japin kontributin e tyre në kryerjen e sondazheve në lidhje me çështje të ndryshme që kanë të bëjnë me të drejtën e informimit;
 - b. Të bashkëpunojnë për hartimin, rishikimin dhe miratimin e rregulloreve e manualeve të ndryshme shpjeguese e veçanërisht për sa i përket sigurisë së të dhënave personale dhe sigurisë së informacionit.
2. Komisioneri angazhohet që të vendos në dispozicion të ILDKPKI-së çdo informacion apo të dhënë që disponon, lidhur me kontrollin dhe verifikimin e të dhënave të deklaratës së interesave private të zyrtarëve-subjekte të ligjit për deklarimin dhe kontrollin e pasurive dhe parandalimin e konfliktit të interesave në ushtrimin e funksioneve publike, pranë kësaj strukture.
3. Palët angazhohen të kërkojnë mendimet dhe sugjerimet e njëra-tjetrës, në rastet e nxjerrjes së rregulloreve, udhëzimeve apo amendimeve ligjore të propozuara, që prekin objektin e veprimtarisë së palës tjetër.
4. Palët angazhohen të caktojnë Personin e Ngarkuar dhe përforcojnë rolin e tij në përputhje me udhëzimin nr. 21, datë 24.9.2012 të Komisionerit.
5. Palët angazhohen për të forcuar bashkëpunimin midis ILDKPKI-së dhe autoritetit përgjegjës, rolin dhe funksionet e tij për të këshilluar, trajtuar, kontrolluar dhe zgjidhur rastet e konfliktit të interesave (të vazhdueshëm dhe rast pas rasti) të zyrtarëve që punojnë pranë Komisionerit.
6. Palët angazhohen të bëjnë të disponueshëm kundrejt kërkesave të arsyetuara dokumente/informacione të punës të konsideruar si jo konfidenciale.
7. Palët angazhohen të ruajnë konfidencialitetin e informacioneve të dhëna nga pala tjetër.

Neni 5

Të drejtat

Me qëllim për të arritur objektivat e kësaj marrëveshje, të dy palët nënshkruese do të kenë të drejtat si më poshtë:

1. Të kërkojnë informacione për veprimtarinë e palës tjetër në funksion të veprimtarisë përkatëse.

2. Të marrin pjesë në takime të grupeve të punës të organizuara nga secila palë.
3. Të marrin pjesë në aktivitete të përbashkëta kombëtare dhe ndërkombëtare që i shërbejnë zbatimit të ligjeve respektive, veçanërisht në trajnime dhe takime pune me nëpunësit e dy institucioneve dhe autoriteteve përgjegjëse.

Neni 6 **Personi i kontaktit**

1. Palët në zbatim të kësaj marrëveshje do të caktojnë nga një person kontakti.
2. Personat e kontaktit do të mbajnë vazhdimisht takime ndërmjet tyre në varësi të nevojës për shkëmbim informacioni dhe do të informojnë titullarin e institucionit në lidhje me zbatimin e kësaj marrëveshje.
3. Komunikimi mes palëve do të jetë në formë zyrtare shkresore, duke mos përjashtuar format më të shpejta të komunikimit.

Neni 7 **Dispozitat e fundit**

1. Palët marrin përsipër respektimin dhe zbatimin e detyrimeve që rrjedhin nga kjo Marrëveshje.
2. Marrëveshja hyn në fuqi në datën e nënshkrimit të saj dhe do të zbatohet me afat të pacaktuar. Në rast ndryshimi të kushteve që kanë diktuar nënshkrimin e saj, palët do të paraqesin dhe miratojnë ndryshimet përkatëse të kësaj marrëveshjeje.
3. Marrëveshja përpilohet në 4 (katër) kopje origjinale, dy prej të cilave depozitohen pranë Komisionerit për të Drejtën e Informimit dhe Mbrojtjen e të Dhënave Personale dhe dy të tjera pranë Inspektoratit të Lartë të Deklarimit dhe Kontrollit të Pasurive dhe Konfliktit të Interesave.

PËR KOMISIONERIN PËR TË DREJTËN E INFORMIMIT DHE MBROJTJEN E TË DHËNAVE PERSONALE

KOMISIONERI

Besnik DERVISHI

PËR INSPEKTORATIN E LARTË TË DEKLARIMIT DHE KONTROLLIT TË PASURIVE DHE KONFLIKTIT TË INTERESAVE

INSPEKTORI I PËRGJITHSHËM

Shkëlqim GANAJ